



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: presssecretariat@samoa.ws

Press Release

11 Setema 2008.

1. Komisi Suesue mo Fana faaulufale mai Amerika Samoa.

Ua finagalo le Kapeneta e fautuaina Lana Afioga Mamalu i le Ao o le Malo mo le tofia o se Komisi Suesue, na te sailiili i le mataupu i le pulega a le Komesina o Leoleo, e faatatau i tuuaiga i le faaulufale o laau malosi i totonu o Samoa.

O sailiiliga a lenei Komisi Suesue o le a noatia ma fai fuafua i vaega taua nei:

- Ia suesue le aafia ai o le Komesina o Leoleo i le aumaia o nei aupega/ fana mai Amerika Samoa i le MV Nafanua;
- Ia suesue pe faamata o gaoioiga a le Komesina o Leoleo ua lē talafeagai ma ona tiute;
- Ma tuuina mai ni fautuaga e faavae ai se faaiuga ua tatau ma talafeagai pe a faapea lea e i ai ni aafiaga o le Komesina o Leoleo.

I le tulai mai o lenei mataupu, o lea ua fautuaina foi le Ofisa Sili o Pulega o Tiute ina ia faatautaia ni suesuega e faasaga i le Alii Ofisa o le Tiute e tusa ai ma lona vaaia o le vaa o le MV Nafanua, lea na aumai ai nei aupega.

Ua faapea foi ona fautuaina le Vaega Suesue Faapitoa a le Ofisa o Leoleo ina ia faatinoina ni suesuega i le Alii Kapeteni ma se vaega o le auvaa a le MV Nafanua e faatatau i lenei lava mataupu.

2. Siitaga Totogi o Pasese o Pasi ma Taavale la'u Pasese Laiti (Taxi).

Ua faamaonia e le Kapeneta le siitaga o totogi o pasese o pasi ma taavale la'u pasese laiti, ma e faamamaluina lenei siitaga i le aso 15 Setema 2008.

O le siitaga fou o le totogi o pasese o pasi ua faatulagaina i le 29% a e 16% mo taxi. I lea la tulaga, o le a siitia ai le totogi maualalo o pasi mai le 60sene i le 80sene, a o totogi maualalo o taxi mai le \$1.30 i le \$1.70

Ua fai fuafua leni siitaga fou talu ai ua faigata ona faagaoioi pasi ma taxi mo le latou tautua i le mamalu o le atunuu, ona o le alu pea i luga o le tau o le suauu ma le penisini, atoa ma tau o vaega ma totoga moomia o taavale.

Ua fuafuaina foi le faia o Tusi Pasese mo le faaaogaina e avetaavale ma le mamalu femalagai.

3. Iugafono Komiti Tauofoga, Taumafa mo Gasegase TTM, Iulai 2008 – Iuni 2009.

Ua faamaonia e le Kapeneta le iugafono a le Komiti o Tauofoga i Talosaga mo le Faatauina o Taumafa mo Gasegase i le Maota Gasegase o Tupua Tamasese Meaole, mo le piriota, Iulai 2008 ia Iuni 2009.

E sefulu ma le fa i latou sa tuuina atu a latou ofo. Sa iloiloina ma le faaeteete nei talosaga, ma sa faatino asiasiaga o faatoaga, oloa siiatoga, oloa tuuaise faapea fale gaosi falaoa. Na silasila totoa foi le Komiti i le gafatia faatino o tauofoga i le lelei tuuina mai o nei oloa i le taimi faatapulaaina ma le usitaia o tulaga faatulafonoina.

O i latou nei ua tuuina atu i ai Konekarate mo leni faamoemoe taua: Taua Ekeroma, Melini TPL Gae, Junior M Tui, Ati Ah Lam, Ricky Westerlund, L A Lome, GM Bakery, Ah Liki Wholesale.

4. Faaafe a Lana Afioga i le Ao o le Malo.

Ua faamaonia e le Kapeneta le faia o le faaafe a Lana Afioga Mamalu i le Ao o le Malo mo le Aumalaga mai Saina a le Shanghai Municipal People's Congress, aso 18 Setema 2008.

O i latou nei sa talimalo i le malaga a Lana Afioga Mamalu ma lana aumalaga a o i ai i latou i Saina. E toasefulu ma le tolu le aofai o le aumalaga ma o i latou nei o le a latou faia le fale fogafaleono o le Malo i Sogi.

O loo i ai nei foi i totonu o le atunuu se isi aumalaga e toaluasefulu mai Saina mo le tatalaina o le Maota fou mo Sui Mamalu o le Palemene. Ua i ai foi le fuafuaga mo le valaaulia na o faauluuluga o lea aumalaga i le faaafe a Lana Afioga Mamalu.

5. Pule Sili o le SIFA.

Ua talia e le Kapeneta le fautuaga a le Komiti Faatonu o le SIFA mo le toe tofia o le Afioga Alosamoa Erna Vaai i le tofiga o le Pule Sili o le SIFA.

Na maea le konekarate a le Pule Sili o le SIFA i le aso 24 Aukuso 2008, ma sa faasalalau faalauaitete ai loa le avanoa e pei ona manaomia i lalo o faiga faavae a le Malo. E tapunia le faasalalauga o le avanoa, na o le tusi talosaga lava a le Pule Sili o loo i ai nei.

Mai le tausaga 1983 – 1989, sa auai atu ai le Afioga Alosamoa Erna Vaai i aoaoga i Iunivesite i Niu Sila mo faailoga o le Bachelor of Arts ma le Bachelor of Laws. Sa faigaluega o ia i le Ofisa o le Tausimavaega (1987 – 1988), sosoo ai ma le Ofisa o le Loia Sili (1989 – 1990). Sa galue foi o ia i le Faletupe Tutotonu o Samoa (1990 – 1992), ma tofia ai i le 1992 o le Resitara o Kamupani i Fafo ma Faavaomalo, Supervisor of Trustee Companies and Inspector of Offshore Banks. O le 2005 na tofia ai loa o ia o le Pule Sili o le Samoa International Finance Authority (SIFA).

6. (1) Feutagaiga Lona Fa a le Forum Fisheries Agency (FFA) ma le Malo o Iapani, 12 Setema 2008,

(2) Asiasiaga i Tokyo mo Tapenaga o le Faatuina Ofisa o Samoa (Embassy) i Iapani, 15 -19 Setema, 2008.

Ua faamaonia e le Kapeneta le auai atu o le Sui Pule Sili o le Matagaluega o le Vaifafo, Tapusalaia T Toomata, i le fono a Malo o le FFA ma Iapani i le asoo 12 Setema 2008.

Na amata feutagaiga a le FFA ma Iapani i le tausaga 2005 ina ua faatuina le Komisi mo le Tuna a le Pasefika. E laualuga le mataupu i le faasaoina o tuna, faapea ai ma le faamalositia o fesoasoani a Iapani mo atunuu o le Pasefika e ala mai i polokalame mo le atiina ae o le tuna, lea na sainia i Palau, 2008.

O le maea ai o lenei fono, ona asiasi loa lea o sui o Samoa mo tapenaga o le faatuina o le Ofisa o Samoa (Embassy) i Tokyo. O le a asiasi atu foi i vaega eseese o Tokyo e ono faatu ai le Ofisa ma le fale e nonofo ai.

7. Tatala Auala Laupapa i Salani.

Ua faamaonia e le Kapeneta le tatalaina o le auala ma le auala laupapa i Salani i le Aso Faraile 12 Setema, 2008 i le itula e Sefulu i le taeao.

Sa fausia leni auala laupapa e le Kamupani a le GM & Associates Ltd i le tau e \$2,498,613.25, ma o le tau aupito maualalo lea na manumalo ai lea Kamupani mai tauofoga faalauaitete sa faia. O le umi o le auala e 540mita. E 8.4mita le lautele a 6 e mita le lautele ua faataina.

O le Afioaga i le Palemia na te fofogaina le lauga autu o le aso.

Government Press Secretariat.